

國方志叢書·華中地方·第九〇七號

據

清·王肇渭等修·郭崇輝等纂
清同治十二年刊本

影印

江 西 省

遂川縣志

(四)

成文出版社有限公司印行

中華民國七十八年三月臺一版

遂川縣志

共四冊

發行人：黃 成 助

台北郵政信箱二二六〇五號

出版者：成文出版社有限公司

台北郵政信箱二二六〇五號

台北市南京東路三段270號9F

電話：七四一五四三二九

印刷者：上林彩色印刷有限公司

台北市大理街145號

新聞局出版登記證：局版台業字第一一四三號

遂川縣志卷之十六

藝文志中

記

遷創龍泉縣水北城治記

宋邑令 何嗣昌

明道癸酉之秋予甫下車首諏風土與沿革之由僉曰泉之疆域東接分水西聯秋坪南至南康北達永新地僻而險俗尙勤儉士清慧而文雅農專力於耕耘工鮮務爲精巧商少出於遠方男婚女嫁多從幼而納聘祭禮喪儀惟隨有無以從宜此一縣民情之大凡也禹貢屬揚州之域秦隸九江郡漢獻帝建安四年孫策定廬陵郡以孫輔爲太守始設縣於江口名曰遂興吳嘉禾四年改爲新興縣晉太康元年徙縣於上流光化鄉復名爲遂興迨隋罷遂興縣其地附泰和州

管轄立什善鎮在今南鄉唐天祐十六年楊隆演據江南僞
號吳改元武義以什善鎮置龍泉場至南唐元宗李景十八
年升場爲縣建縣遂水之南曰龍泉卽我太祖神德皇帝太
宋建隆元年也縣境舊所隸四鄉曰遂興龍泉光化禾蜀南
唐李氏分四鄉爲六增懷德永樂而職方入我本朝改遂興
爲永興併龍泉懷德永樂三鄉爲南北二鄉合光化永興禾
蜀爲五鄉輿地方百里許當年設縣立城未卜地之善止周
迴三里高僅八尺規模陋隘或葺或圯予思國家涵濡之澤
休養生息庶類日繁爲令者承昇平隆盛之時撫育羣黎不
事城郭宮室而民熙遊化日自相安於田里而無事間有萑
苻之患蹂躪我民人荒廢我土地傾敗我室廬綢繆未先如
我民之荼毒何春秋書築城數十固非雖時必書獨責鄭之

不能有虎牢卒以地資敵取侮故設險守國聖經明以爲訓而揆日卜吉亦載賡於衛風此城治創建之不可無而擇地經營尤所宜究心也今一縣之形勢所爲水北桐木塹者氣象高敞更勝於南方予周視詳審永可設縣以爲民極而泉邑人心亦感激思奮咸樂新遷以保桑梓僉謀既定疏奏報可乃覈帑庾計其多寡復百端措畫凡可以佐其費者小則便宜行之大則具題取決於是一錢不斂於民上下交而事克濟矣遂屬縣丞王文炳同尉楊嘉憲暨邑紳羅覺鄉耆李志仁郭本彝孫希顏督役蔣應俊等相厥土宜平其高下民居有不便者築室遷之以正中爲縣治若前後左右衢道溝洫一一列定厥位經畫分明乃選材木具餽篋備畚器授工人以成算先作正堂三間聽政臨民宏大軒昂高二丈六尺

有奇深倍之廣加於深者六之一堂之後爲嘉善堂名仍存舊額屋五間高一丈八尺深殺於正堂者五之一廣視正堂不及者七之三衙宇處其中厨庖僕隸居其兩旁堂之南面作儀門三間以肅其出入堂之前東爲皇華使館西爲廉憲分司其餘戒石有亭豐衍有庫更鼓有樓以及學舍同官廨舍司獄司胥吏之舍諸所宜設者次第極其整備地址南北直深八十二丈東西橫寬六十五丈四圍環以土垣其規制大槩若此然治基雖立猶未城也予復繫其高卑度其廣狹計其丈尺召民趨事僉謂和會築之而功簡登登薨薨百堵皆作不數月而城就周圍凡四百四十八丈有奇高一丈二尺加垛雉六尺設東西南三門門上建樓其北門未闢以不便於民也濠濶二丈深五尺接虎潭水由西南門而下流城

制略備雖未能大埽以磚石而金湯之固可以歷世而永賴
是役也民不苦勞事皆就緒工始於景祐元年之八月訖於
三年之十月約費一萬八千六百有餘兩俱取諸公藏用皆
官給而有節民皆子來而協心其成功亦何速耶至是而百
里之地金墉有慶五鄉之民翕然瞻仰所以衛寇防盜弭變
消虞維持泉疆於太平永遠之域者不在此一舉乎予何敢
以功自居哉但述其事以鑲之石俾後之官斯土者有所考
焉是爲記

重建龍泉縣治記

宋縣倅郭勁

建炎三年金兵飲馬江西腥膻虐焰被於廬陵諸邑惟龍泉
以僻左僅存衣冠飄泊塵屑疊踵不幸奸宄垂涎爲弄兵之
地明年零都寇邱權長驅入縣自冬徂春罹其焚剽者十六

七權退不旋踵而劉雄繼之紹興改元雄死其黨彭友遂屠井邑官吏越境僑治於萬安流離散徙生民無幾間保桑梓非賊之輔牙卽帶刀佩劍之惡少良氓封殖殆不禽獸若至紹興四年四月大將岳公飛提兵剪賊六月奏凱邑中平復冬十月臨川王公徽以右朝散郎出宰吾邑問邨落則敗爲邱墟問田疇則鞠爲草萊問版圖則燼爲飛埃問丁男則轉爲塗殍問風俗則稔爲暴戾乃於曠野中睨而望之得枯體无礫之區者縣之故基也公喟然嘆曰闔閭可興圖版可訪戶口可以招徠惟是暴戾實未易化雖然亂可弭而不可激吾當先正官守馴致其道宜不約而自化不日剪菅榛開徑路樹垣墉揆棟宇取斷宋敗甓於灰燼之中卽其地而築之凡三月而後成爲屋百餘楹視事有堂吏有舍簿書有庾金

帛有帑囚有囹圄粲粲治所罔不畢張於是流亡襁屬而歸
錯處強宗悍族之間求田問舍各安其分連閭比黨緩帶吟
笑往往慈祥相友而不知昔之艱危痛苦者嗚呼公之爲政
可謂得其序矣初縣之風俗謹厚農力穡士就學大抵子弟
多賴有一不肖十手指而羞之科甲之士以節義爲尚此其
概也自今喪亂薰染惡習遂至流弊如此非公亟正其本使
典型有所從效幾何其不禽獸如也勁歸柴荆喜見奠枕因
記梗概以示里閭若夫縣之廢置易改事具圖志此不復書
龍泉縣增築外城記

宋江西陳 塏
安撫使

考龍泉縣城創自本朝何寺丞爰築土垣歷年旣久墉堞頽
圯濠塹堙塞漸不可恃邇年以來羣醜乘間嘯聚雖有修葺
不過斬荆榛增庠培薄而已靖康初詔天下修郡邑城池令

其堅固而守令多不盡心辦理予奉命安撫江西荷千里重寄凡郡邑州縣城郭公廨有關於國家者亟令修整親歷各屬既肅廼謹按行至泉暨僚屬周覽險要泉父老遮道迎予告曰邑之有城所以禦寇盜也外城之築定議久矣費無所出欲修而無從予聞之不覺扼腕驚怖以爲精銳障禦之謂城公私積貯之謂城四門挫敵之謂城此一方之要害所當急者如卑隘勿完萬一烽烟告警爾民何以爲守吾爲若屬終圖之父老頓首曰幸甚予是以綜理其事計工度用資取給於公又勸有力者借助遂命吉安通判林宗偉董其役復以邑之智慮宏遠之李宗尹等爲之經營而周詳乃筮日興工伐石陶甃庶民齊力以嘉熙二年八月經始明年九月訖事城周圍九百三十八丈址廣一丈二尺高一丈五尺加雉

堞六尺開闢北門共爲門四俱建門樓內爲馬道外鑿濠池
爰虎潭水約費八千餘兩厥功告成貽詳於予報竣父老復
欲徵一言以紀事予曰築城設險以爲民今整飭有備安堵
萬山之中而庇及百里之遠其所保釐者大而爲利亦無窮
矣俾述其當日增築顛末永之貞珉以爲後之嗣守者知成
功之不易而繕修之惟謹云

重修龍泉縣城記

李迨 邑人

月令每歲仲秋之月築城郭夫所謂城者所以保民而郡邑
依以爲固及時修之乃所以重根本也泉城前安撫使陳塏
慮承平日久漸以廢墜已令修築煥然一新比年以來又聞
有暴客之患前令如郭侯應祥李侯大訓劉侯必端牧民施
政嘖嘖稱賢至於城垣之繕理而未暇豈以爲非急務耶抑

有待而然耶今侯以本州奏辟來蒞茲土先考泉之民情土俗次審其邊幅隘塞復登陴閱視慨然曰方今東南之勢保障爲急匪城曷邑匪人曷城是則在我其急修之便適巡撫都御史檄下令各修城池而侯志行矣率民集庭下宣上德意征鄉都役以丁諭市廛助以財乃召好義之人勸能董工復屬丞尉各督其事侯則經營區畫運籌出納而申勉之卜吉興役以公過發不以私擾稽城原制四達有門名仍其舊堞雉高廣復因前規各用磚甃以圖堅久由是事以奮起功不勞而成百姓咸謂侯固我疆圉無弗歡嘆感興願爲効力其雲集如響載始於淳祐三年癸卯六月至明年甲辰十二月訖工用力以功計幾萬幾千用財以金計幾千幾百章簡令該期以不愆君子謂我侯之大有造於泉也若侯之從政

明敏興利除弊以胞與爲體以至誠爲宗循良事蹟與龔黃
後先相望然此特其一節未足爲侯重第邑人德侯之勤不
可虛辱余南歸歸里幸觀厥成不辭鄙俚以紀其事侯姓王
名滿字伯山衢州人將命惟謹賢勞足徵乃縣丞翁文正尉
趙孟垵其義官李蒙俱可嘉者也並宜書之以垂無極

縣治題名記

宋進士 郭 勛
推官

昔天子錫人官之問有曰安身取譽爲難蓋見知於上則能
安身得心於下則能取譽二者並行而不相悖斯足以仰膺
膺眷俯慰民瞻坐俾聲華勲業輝映今古而今之爲政者或
尙威嚴以足國謂可安身矣奈結怨於下何或推慈惠以濟
民謂可取譽矣奈速辜於上何速辜於上則身難以安結怨
於下則譽難以取而況戎事方興神州未復有征防餉饋之

供使府送迎之費既無府庫見頓之物必假皂隸鞭笞之勢
乃能率辦先期而朝廷恩詔常存寬恤毋得橫歛茲涖官者
所以尤難於宰邑之職也龍泉自國初躬置以來綰銅章墨
綬者其詳靡得而聞稽諸圖誌謂寺丞何公從水南徙治於
此惟陸若濟茂著政績粵自金兵亂夏黃巾蜩起建炎庚戌
虔寇邱權長驅入境時王牒趙公廸之率吏民柵山爲壘旗
鼓振耀兇徒畏戢焚剽郊外而去有捕卒劉雄薦起郴界尋
至紹興之初其徒彭友遂衝入縣治於是邵宰世卿倉皇出
奔僑治於贛陽而寇勢益張綿亘數百里編氓咸遁於大江
之東越明年季春承宣使岳飛始提精銳鼓行而西擒勦殆
盡克復之初朝請王公下車寓長壽寺爲理所爰召百姓分
葺廨舍不日而成滿考而李文林代之居無幾何殘寇奄至

再罹暴焰帑廩爲之一空旣而以疾在告郡將舍人王公穆
檄敦請里居郭倅權邑事時有旨宰田地畝分倅以私稅均
敷不擾而辦王公揭之以表諸邑暨李不祿攝理允三人越
四載王宣教被命而至未幾解官繇此士夫相傳謂是邦當
惡少出沒之地閭里不安租稅難辦久缺正授允假攝者又
十有三年絡繹去來眎如郵傳舉無善最可記惟郭修職張
承議蘇奉議張從政以撫字教養爲意人到於今思之追甲
戌季冬上官承議甫獲正調自此胡宣教張承議以次蒞政
大抵自兵火之後宰於茲者非太寬卽太猛猛則民殘而越
訴者繁寬則民慢而干紀者衆其弊不可毛舉獨蘇張之治
寬猛適中而張公天資忠厚學識明敏持心公正視篆之初
撫摩凋瘵振起頽綱兼五美以爲政用片言而折獄期限靡

亟而人戶樂輸賦歛不加而軍需畢集其育才則兩科之士
皆步青雲其恤稅則萬井之間普沾實惠揉強梗以爲善良
驅寇攘而事稼穡是以干戈載戢狴犴屢空上致軍國之饒
下格士民之譽二千石以列於外臺部刺史以聞於當宁信
乎黎元之父母師師之表儀則安身取譽之道兩造其極矣
以故邑之士庶私相謂曰古郡縣皆有題名而吾邑蔑然端
爲缺典今公之善政彰彰炳炳詎可不書乃屬勛序其大概
而記其爵里植於廳事以示將來庶期後之君子承繼不泯
焉

新修主簿廳記

宋侍郎孫逢吉邑人

主簿之官所以主諸簿目近乎會計之吏也初漢之設與諸
曹掾多以本郡人爲之皆令長自調用至隋始置之革選盡

用他郡人晉亦有之其餘史不概見焉我朝定鼎繼漢隋而存其官要亦因其租稅之所入科斂之所徵而設是官以任其事也龍泉之立是官也曷故龍邑生產之都肥美之地負販往來之區也歲之所供園林之折色也若干物貢之起征也若干土壤之定則也若干行止之貨之輸於關權也又若干其指數也雜其出納也煩非有專官勢不得以兼攝而免混淆之弊也然官設而未有居官之所何也則以龍邑之舊爲龍泉塲於南唐後陞爲縣官舍公廨缺焉未備何侯遷治於北次第以興爰及於今黃公牟始得縣治之東而創建之斯廳煥然一新復作退閒之室曰唯是齋又曰弗告堂洵一時之盛舉也予思建邦設都惟以亂民古聖之制也一官缺而事廢一職溺而位虛毋曰是職其不甚重輕乎朝廷之任